



Groupe parlementaire

Här Claude Wiseler

President vun der Deputéierte Chamber

19, um Krautmaart

L-1728 Lëtzebuerg

Lëtzebuerg, den 8. Januar 2025

Här President,

esou wéi d'Chambersreglement et virgesäit, bieden ech lech, dës parlamentaresch Fro un d'Madamm Gesondheetsminister, un d'Madamm Minister fir Landwirtschaft a Wäibau, souwéi den Här Wirtschaftsminister weiderzeleeden.

De Gesondheetsministère ënnerstëtzt dës Joer fir d'éischte Kéier offiziell d'Campagne vum sougenannten "Dry January". Dës Campagne, déi ursprénglech aus Groussbritannien stamt, ríft d'Leit dozou op, mam Start vum neie Joer den éischte Mount komplett op Alkohol ze verzichten. Eng Vertrieederin vun der Campagne huet op der Antenn vun RTL dovu geschwat, datt de Gesondheetsministère an deem Kader ënner anerem Lizenze fir eng entspriechend App finanzéiert huet¹. Zur Begrënnung vun der Campagne huet déi Vertrieederin notammet de statistesch extrem héijen Alkoholkonsum hei am Land ugefouert (11 Liter rengen Alkohol pro Awunner/Joer). D'statistesch Verzerrung duerch den Tourismus, d'Grenzgänger an de staarke Verkaf an d'Groussregioun huet si dobäi allerdéngs net erwänt.

Aus dem Beräich vum HORECA souwéi vun de Produzente kënn vill Kritik. Si fäerten duerch dës politesch Ënnerstëtzung vun enger privater Campagne, weidere finanziellen Drock an enger wirtschaftlech souwisou ugespaanter Situatioun.

An deem Zesummenhang géif ech der Regierung gär dës Froe stellen:

- 1) Wéi begrënn d'Regierung déi Decisioun, fir offiziell als Partner vun enger Campagne opzetrieden, déi sech ëm eng privat Decisioun dréint (Alkoholkonsum)? Wéi gëtt déi Decisioun begrënn, Abstinenz während engem Mount ze ënnerstëtzen nom Motto "alles oder näscht"?
- 2) Wéi wëll de Ministère domat sécher stellen, datt d'Leit iwwert e verantwortungsvollen Alkoholkonsum informéiert sinn, souwéi déi gesondheetlech Follge vun engem net verantwortungsvollen Alkoholkonsum?
- 3) Gouf dës Ënnerstëtzung vum "Dry January" am Virfeld interministeriell koordinéiert? Falls jo, vu wéi engen Zuelen oder Prämissen geet d'Regierung aus fir:
 - a. d'Unzuel u Leit déi matmaachen;
 - b. de Wirtschaftlechen Impakt;
 - c. den Impakt op d'ëffentlech Gesondheet?
- 4) Wéi eng Donnéeën ginn am Kader vum "Dry January" erhuewen an duerch wéi eng Institutioun?
- 5) Kann d'Regierung eng Tabell presentéieren mat folgenden Donnéeën:
 - a. wéi vill Alkohol zu Lëtzebuerg all Joers verkaf gëtt pro Mount;
 - b. wéi vill Alkohol tatsächlech hei zu Lëtzebuerg konsuméiert gëtt pro Mount;
 - c. wéi sech déi Zuelen op déi eenzel Kategorië vun alkoholeschem Gedränk verdeelen (Béier, Wäin, Likör, héichprozentegen Alkohol, asw.)?

¹ <https://www.rtl.lu/news/national/aka-bamberger-fachberoderin-fir-suchtpraventioune-vum-cnapa-938126472>

- 6) Kann d'Regierung dobäi, sou wäit wéi déi Donnéeë verfügbar sinn, de soziale Kader vum Konsum (HORECA), ëffentlech Veranstaltungen, private Konsum asw.) preziséieren?
- 7) Wäert d'Regierung duerfir suergen, datt d'Zuelen zum Verkaf zu Lëtzebuerg an zum tatsächleche Konsum hei zu Lëtzebuerg allgemeng, a besonnesch am Kader vun der Campagne, net matenee vermëscht ginn, och fir en Imageschued fir déi betraffe Secteuren ze vermeiden? Falls jo, verlaangt d'Regierung déi Suergfalt och vun den Initiateure vun der Campagne?
- 8) Wéi vill kascht d'Partnerschaft vum "Dry January" insgesamt? Kann d'Regierung eng Tabell presentéieren, déi déi eenzel Kategorien (elektronesch Lizenzen, Publicitéit, Subsiden asw.) regruppéiert?
- 9) Huet d'Campagne vum "Dry January" Auswierkungen op d'Neijoerschpätt vun ëffentlechen Institutiounen? Gouf et am Virfeld eng Recommandatioun oder Direktiv, fir op entspriechende Veranstaltungen op d'Offer vun Alkohol ze verzichten?
- 10) Gesäit d'Regierung vir, Produzenten an Ubidder vun alkoholeschem Gedränk fir eventuell Verloschter, déi duerch déi offiziell Ënnerstëtzung vum "Dry January" entstinn, ze entschiedegen? Falls net, firwat net?
- 11) Gesäit d'Regierung vir, Produzenten an Ubidder vun entalkoholiséiertem Gedränk (0% Béier, 0% Wäin,...) finanziell ze ënnerstëtzen, fir z.B. d'Fuerschung an deem Beräich virun ze driewen, erhéichte Produktiounskäschten opzefänken, asw.?

Mat déiwem Respekt,



Alexandra Schoos
Deputéiert